



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 6



BFI-i foreign coach asütsü
Dmitry Dmitruk shimogo

Karbi Anglong nung Rs 25 crore
alang heroin aika apu



VOL. XX NO. 131 (ADOK 131)

DIMAPUR RASEMNÜ (WEDNESDAY)

TSÜKLAI (FEBRUARY) 22, 2023

₹ 5.00

Feb 25 nü nüboyimba tembangtsü

Dimapur, February 21, 2023 (TYO): 14 buba Nagaland Legislative Assembly, 2023 atema nüboyimba maparen February 25, 2023 nikongdang 4:00 ako nung atemtsü, ta Chief Electoral Office, Nagaland-i metetdaksü.

Iba mapang nungi tenzüker polling maparen metembang tashi taruba ghonda 48 tsüingda election dak sendakba senden mayongtsü, public sentong nung madentsü mesüra yimdong sema mesenzütsü, ta CEO Nagaland-i ashi.

Iba tenokdangba mapang cinematograph, television mesüra ibala mesükba sabang ajanga election dak sendakba osang kecha mesayutsü. Maneni, kenten sentong mesüra jilushi sentong mesüra

entertainment/amusement sentong kecha ayonga magütsü ta paisa ashi.

Iba tetuyuba alema inyakertem ozüing tapet agi merenshütsü aser District Election Administration/Police Administration ajanga nüboyimba mapang temer political party züingsemtemi constituency toktsür aotsüsa mapa inyaksü metetdaksü, ta CEO Nagaland-isa ashi.

Ajisüaka, Nagaland in-charge ama inyakba political party ketdangpurtembo iba tenokdangba kübok madener. Parnoki State Headquarters nung anenzüktsü aser tenokdangba mapang pa/lai party office nungi pa anenzükdak tsüingda dang senzüsenbongtsü, ta paisa metetdaksü.

Voter Information Slip ya maütsü ama mamshütsü

Dimapur, February 21, 2023 (TYO): Nagaland Legislative Assembly, 2023 nung Voter Information Slip ya voter tem indang maütsü ama mamshütsü. Iba ya electoral roll nung serial

number aser polling station, polling asüba anogo, mapang amala metetpelatsü atema dang agütsür, ta Chief Electoral Office, Nagaland-i metetdaksü. (Maneni tapak 2 nung...)

BJP sorkari Naga yimten latettsü temulungtetba mali: Mallikarjun Kharge

Dimapur, February 21, 2023 (TYO): Narendra Modi-i aniba sorkar ajanga Agreed solutions mapa küma tenzüksü temulungtetba mali aser Nagaland nung alir dang masü saka linük nung alirtem ashioktsüogo.

"BJP-i Naga yimten latettsü atema süoki ia mebilerem" ta Congress president Mallikarjun Kharge-i Mongulbarnü Diphupar local ground nung election rally ka nung ashi.

Naga civil society ajaki yimten latettsü takhangba agütsüogo saka tang aliba state sorkari olemtep talika nungdaker ta tatemtsü shia iba mapa atsülanger. State sorkari Naga yimten melatetnünür, ta Kharge-i ashi.

Prime Minister Modi-i August 3, 2015 nü Naga yimten tebilemsü koktetogo ta ashi. Iba ya Framework Agreement (mezüingbo 'Naga Accord') sign asü dang ashi saka küm 8 jungnüa aruaka tazüingla lir, ta paisa ashi.

Congress party-i dang Naga yimten tebilemsü latettsü atema

mapa tenzüker. Tanüa Congress indang manifesto nung iba onük ya tongti tenangzükbatem rongnung ka lir, ta paisa shisem.

BJP sorkari kodanga Nagaland atema mebileremtsü. Parnoki Nagaland sasep nung telemsa adoktsü aser Arlla 371A agientsü atema inyaker, kechiyong iba ajanga Uniform Civil Code (UCC) zübazüba inyaksü. UCC ya BJP indang tebilemba tongtipangba lir, ta Kharge-isa metetdaksü.

BJP indang politics ya Naga lisopur indang sobaliba samatsütsü atema lir. Nagaland nung alirtemi iba ama mapa anema noktaksüla, ta paisa ayongzüker.

Centre aser state nung BJP sorkartemi Eastern Nagaland nung atema aria bilemsür ama sayur, saka iba ya tiyazü aser BJP sorkari teti inyaka aruba tiyazü tenangzüker ka dang lir, ta paisa ashi.

Congress-i Nagaland nung nisung ajak ajungtsü atema inyaksü bangzünga lir. Onoki sorkar akümsü tashi ngura party

manifesto nung shia aliba ajak inyaksü, ta Congress president Mallikarjun Kharge-isa ashi.

India nüjiso ya 1947 nung masü saka 2014 küm Narendra Modi-i Prime Minister inyakba sülen angu ama BJP pusemertemi bilemer. Parnoki 1947 nüjiso mebilerem, ta paisa shisem.


"Taküm election nung Congress candidate 23 lir aser parnok ajaki takok angutsü teimla lir. Nagaland nung alirtemi kechiba nübertem ashioktsüba party ka nem vote enoktsütsü?" ta NPCC president K Therie-isa ashi.

"Khristan tamanger 95% aliba lokti kati kodaser anogoshia Khristantem reshikangshiba party ka nem kechiba vote enoktsütsü. Asenoki chichiba democracy inyakra Congress candidate temi tamakok mangutsü, saka sen aser tanga tashi ajanga Congress candidate tem timtemer. Ajisüaka onoki nübertem asoshi masetshii noktaksü" ta Therie-isa metetdaksü.

NATIONALIST DEMOCRATIC PROGRESSIVE PARTY (NDPP)

Facta non Verba

- SECURE HEALTHCARE
- PROGRESSIVE AGRICULTURE
- QUALITY EDUCATION
- SKILLING TO BE FUTURE READY



NAGALAND - TOWARDS A STATE OF EXCELLENCE



February 21, 2023 nü Wokha nung Flag March ali



Dimapur, Tsüklai/February 21 (TYO): Aruya aliba 14th Nagaland Legislative Assembly 2023 election tajungtiba nung tiptema agitsü mechi Wokha town nung February 21, 2023 nü flag march agia liasü.

Iba flag march ya Deputy

Commissioner & District Election Office, Wokha, Ajit Kumar Ranjan, IAS aser Superintended of Police, Aotula T. Imchen IPS nati anir agia liasü.

Nüburtem nem temolung lemtedaktsütsü aser parnok kumzüka ayutsü mechi security forces tem lir ta

sayutsü aser tarendak makai vote agütsütsü ajungmesoa iba flag march sentong ya ayongzüka liasü.

Iba flag march nungya CRPF, STF, MP Police, Jharkhand Police, IRP, aser IRP (Mahila) nungi sepaitemi shilem agia liasü.

Dimapur atema Polling Officer tem training 3 buba agitsü

Dimapur, Tsüklai/February 21 (TYO): Deputy Commissioner & District Election Officer Dimapur, Sachin Jaiswal IAS ajanga 14th Nagaland Legislative Assembly, 2023 atema aruya aliba General Election atema Dimapur district asoshi presiding officer, 1st Polling Officer, 2nd Polling Officer, aser 3rd Polling Officer ama shimteta aliba ketdangsür/staff ajak dang sangdong ka nung

training round tasembuba nung adentsü metetdaksü.

Sangdong ajanga ashiba agi, Presiding Officers, 1st Polling Officers, 2nd Polling Officers aser 3rd Polling Officers tem training ya February 22, 2023 nü Dimapur Government College nung anepdang 10:00 ako nungi 11:00 ako tashi alitsü.

Grade-IV staff tem training ya February 22, 2023 nü anepdang 11:00 ako nungi alitsü, ta ashi.

Polling personnel ama shima aliba ketdangsür/staff ajak Election Commission of India indang deputation nung alitsü aser Election Commission of India indang tazüokba kübok parnok yinya nung alitsü.

Maneni Dimapur district kübok aliba Head of the Department ajak dang pei department nungi shimteta aliba ketdangsürtem iba training nung dendaktsütsü totuyuba agütsüogo.

General Observer-i Kohima district atema Micro-Observer ajuru

Dimapur, Tsüklai/February 21 (TYO): 14th Nagaland Legislative Assembly 2023 atema aruya aliba General Election tajungtiba nung agitettsü mechi Deputy Commissioner & District Election Officer, Kohima, Shanavas C den General Observers MJ Pradip Chandran aser Janak Prasad Pathak nungeri Kohima district atema Micro-Observer tem den

senden ka February 21, 2023 nü DPDB Hall, Kohima nung mena liasü.

Iba senden nung DC & DEO Kohima Shanavas C ajanga ashiba agi, Kohima district kübok polling station 184 nungi polling station 63 bo Micro polling station ta jangjatetogo.

Pai iba mapang Micro-Observers teinyaktsütem lemsatop aser parnok dang Polling Personnel mapa shidak

inyaker asü masü ta mita reprangtsü metetdaksü.

Election agiba mapang timtem ajurudang polling ketdangsürtem yariteptsü aser nungdakba facility tem ali mali reprangtsü pai Micro-Observer tem dang ashi.

EVM aser VVPATs tem amshitsü aser raksadang yanglutsü yimyatem Master Trainers temi Micro-Observers tem dang sayua liasü.

Voter Information Slip ya maitsü...

(TAPAK 1 NUNGI...)

Electors Photo Identity Card (EPIC) agüja alir ajaki polling station nung vote meinoktsüdang EPIC sayutsüla, ta CEO-isa ashi.

Maneni, EPIC malirtemi tsünglanglen agüja aliba kulikakettem bener arua sayutsüla.

1. Aadhaar Card;
2. MNREGA Job Card;
3. Passbooks with photograph

issued by Ban/ Post Office;

4. Health Insurance Smart Card issued under the scheme of Ministry of Labour;
5. Driving License;
6. PAN Card;
7. Smart Card issued by RGI under NPR;
8. Indian Passport;
9. Pension document with photograph;

10. Service Identity Cards with photograph issued to employees by Central/ State Govt. PSUs/ Public Limited Companies;

11. Official Identity Cards issued to MPs/ MLAs/ MLCs; and
12. Unique Disability ID (UDID) Card, M/o Social Justice & Empowerment, Government of India.



Alima Tetsü Oshi Anogomung Tsüklai 21 nü amungtsü lia, Unity Ao Baptist Arogo nung lanurtem asoshi "Ao Oshi Asentenshiba" sentong ka taoba amungnü Tsüklai 19 nü aliba sentong temer tenka ki kilung nung arogo lenirtem den külemi agiba noksa ka yangi angur. Iba sentong nung shisalen teyurji Tir Yimyim Yimozülur Wb.K.Temjen Jamir liasü. Iba sentong nung lanurtem noklang dak tema denogo.

Dimapur nung mejangjaba tasü mang ka ngutet

Dimapur, Tsüklai/February 21 (TYO): Dimapur police sangdong ja ajanga ashiba agi, February 20, 2023 nü mejangjaba nisung (tebur arishi küm 25 shi) tasü mang ka Duncan Basti, Dimapur nung aliba Finger Print (Printing Press) tesülen takdang tazüngla ka nung sür aliba ngutet.

Tasü mang ya tera shisa orr liasü. February 21, 2023 nü District Hospital Dumapur nung

Post Mortem Examination agi aser Histopathological aser Chemical examinations atema specimens agizüka liasü.

Iba nisungba ya long pant sentüsü tanak aser t-shirt sentüsü tanak semer liasü.

Kibur/kinunger/tembar temi Officer-in-Charge, West PS Dimapur den Contact no.7085055024 ajanga tongteprateptsü metetdaksür, ta sangdong ajanga ashi.

JMC nung International Mother Tongue Day mungogo



Jubilee Memorial College, Mokokchung nung February 21, 2023 nü 'Multilingual education- A Necessity To Transform Education' omen nung ajemdaker 24 buba International Mother Tongue Day amungdang kaketshir temi Watsu Mungdang tir Arenla Longkumer tushia agizükba noksa nung angur.

Dimapur, Tsüklai/February 21 (TYO): Jubilee Memorial College, Mokokchung nung 24 buba International Mother Tongue Day sentong February 21, 2023 nü 'Multilingual education- A Necessity To Transform Education' omen kübok agia liasü. Iba sentong ya Department of English, JMC ajanga ayongzüka liasü.

Iba sentong nung tongti o jembir ya Watsu Mungdang tir Arenla Longkumer liasü aser lai oshi aser sobaliba kota tongtipang, itemji lemsatop aser oshi wazüka ayutsü aser temaba jembia liasü.

"Shisaliok temaba jenjangi ajungkettsü asoshi oshi ya tongtipangtiba aser tashi tulutiba hadir lir," ta lai ashi.

Laisa oshi balala shisaliok indang jembi aser itemji ajanga asen shisatsü aser molungsentsü aniba indang rateta ashi.

Iba sentong nung Dr. Imtiwati Jamir, Principal, JMC ajanga tarur pela agizükba o jembi aser tetsü oshi nung temolung agütsütsü ayongzüka liasü.

Iba sentong nung India nung kin balala nungi kaketshir temi shilem balala agia liasü aser Chungli oshi nung Spelling Bee tetoktepba agia liasü.

Spelling Bee tetoktepba nung mezüngbuba jenjang ya Sashimenla (Semester VI) ajanga ngutet, tanabuba jenjang Talimenla (semester IV) aser tasembuba jenjang Imkongmeren (Semester VI) nati nguteta liasü.

Concert of Friendship nung Nagaland nungi kaketshir 8-i shilem agitsü



Dimapur, Tsüklai/February 21 (TYO): Dr. AR Rahman indang KM Music Conservatory ajanga British Council, Chennai den lungjemer India/UK Together - Season of Culture nung shilem ka ama ayongzüka 'Concert of Friendship' atema Sunshine Orchestra Nagaland Chapter nungi violin student ti shimteta lir.

'Concert for Friendship' ajanga lanur kentener 100 dak tema lungjemdaktsütsü aser parnoki classical composers, Scottish melodies, Naga aser Tamil nungi folk songs aser Carnatic melodies nung shilem agitsü.

Dr. Adam Greig, Academic Coordinator KM Music Conservatory ajanga Task Force for Music & Arts (TaFMA) dangi mail ka yokba nung ashiba agi, "Onoki Big

Noise, Sistema Scotland nungi musician lanurtem anir arua KM aser The Sunshine Orchestra nung musician tem den lungjemer hopta ka (February 25 nungi March 4) musical aser cultural interactions alitsü aser Sir Mutha Venkatasubba Rao Concert Hall, Chennai nung March 4 nikongdang 7:30 ako nung Orchestral Concert ka ayongzüka tembangtsü."

Music Residency aser concert atema Nagaland nungi shimteta violin students ti ya Kohima Orphanage & Destitute Home nungi lir.

The Sunshine Orchestra Nagaland Chapter ya music project ka lir, koba Dr. AR Rahman aser state sorkari AR Rahman Foundation aser TaFMA, Government of Nagaland teyari nung tenzü.



India dangi Turkey Ambassador Firat Sunel aser tamangba yimsü balala lenirtem New Delhi nung Turkey indang embassy nung asürtem nem akümtetushi agütsüba sentong nung shilem agiba noksa nung angur.

Rahul Gandhi-i masü PM Modi-i LAC-i sepaitem yok: Jaishankar

New Delhi, Tsüklai/February 21 (Agencies): Arrtsü nung China den mangatetep adokba atema Congress-i aiben ashishiba External affairs minister S Jaishankar-i aitsüogo aser ashiba agi, "Rahul Gandhi-i masü saka PM Modi-i LAC-i sepaitem yok" ta ashi.

China-i amokmerenba telangzüba agütsütsü atema Centre-i jenjang tapet magir ta Congress-i aitsüba mapang ka nung Jaishankar-i, China den arrtsü nung mangatetep adokba mapang India-i sepia aika yokogo, ta ANI den sensaksemba mapang ashi.

PM Modi aser Jaishankar napronglai China tenung tetshia mejembi ta Congress-i ashiba dak sendakba nung external affairs minister-i, China den arrtsü nung taoba mapang dang nungi tang sepaitem timba yoka lir ta ashi. "Onoki parnok ajungyim nung jembir süra shibai India Army LAC-I yok. Rahul Gandhi-i masü Narendra Modi-i parnok yok," ta Jaishankar-i ashi.

Minister-isa, sorkari LAC nung sepaitem ya sen aika intoka aser kanga meranga inyakteper yua lir ta ashi.

"Iba sorkar yagi arrtsü nung infrastructure ajungkettsü atema pongosü agi timba sen intokogo. Süra shiba defensive aser accommodative aji shiang? Shibai ochi jembir?shibai puti otsü den asayar," ta Jaishankar-i asüngdang. "C agi tenzükba ojang angatettsü 'Congress tebilemstü akar," ta pai ashi.

Jaishankar-isa, taoba küm Pangong awatsüng anasa China-i apu ka yangluba atema Centre anema jembiba atema Congress aser Opposition party temi aitsüogo.

Minister-i ashiba agi, iba

tesem ya 1962 rara tembangba sülen China-i ozüng alema atsünga lir. China dak sendakba nung Congress-i sorkar aitsüba indang jembidang pai, lenirtemi C agi tenzükba ojang angatettsü tebilemstü akar asütsü, ta pai ashi.

"Item tesemtem ya China-i kodang amokbang? Parnoki(Congress) C agi tenzükba ojang angatettsü tebilemstü akar südi. Parnoki asa iba tensa mashiyimi meyipzüksü meranger ta bilemer. China nungertem mezüng 1958 küm aru aser 1962 küm October ita iba tesem atsünga liasü. Tang China nungeri 1962 küm atsünga apu 2023 küm Modi sorkar dak tai tongloktsür," ta Jaishankar-i ashi.

"Rajiv Gandhi 1988 küm Beijing-i ao... 1993 aser 1996 küm tenangzüktepba yanglu. Item tenangzüktepba yangluba ya tai masü. Arrtsü nung tensa azüoktsü atema iba mapang nung item tenangzüktepba yanglu asütsü aser iba ajanga arrtsü nung tensa tajungba akum," ta pai ashi.

Jaishankar-i, foreign policy indang junga memetet aser kar angazüktsü nungdaker ta Congress lenir Rahul Gandhi-i ashiba indang asüngdangba mapang external affairs minister-i, ANI dang, Wayanad MP-i China dak sendakba nung pa dang nungi tajungba metetal lira angazüktsü asoshi pa mulunga lir, ta ashi.

"Iba o ya pai lokti senden ka nung jembiba asütsü. Iba ya China dak sendaka alitsü. Ni ashitsüba ajunga agi, ni China nung ambassador talangtiba inyaksang lir. Ni arrtsü dak sendakba nung ken o aika achaayanga aruogo.

"Ni tangar dang nungi tajungba meteta lir ta ashir masü, saka nia iba ken o junga meteta lir. China dak sendakba nung pai kü dang nungi tajungba meteta lira shisatsü agitsü atema mulunga lir," ta Jaishankar-i ashi.

Maneni LAC nung China tsütsü yimtsüngtem amenokyonga aoba indang jembiba mapang external affairs minister-i Congress nem telangzüba ajang ajanga agütsüogo aser ashiba agi, 1962 küm atalokba opposition party-i amatoker.

"Asenoki arrtsü nung infrastructure yanglutsü nungdaker. Kechiba Congress-i aniba sorkari infrastructure tem meyangu? Modi lenisüba nung arrtsü nung infrastructure atema sen intokba reprangdang; pongosü agi timba kümogo. 2014 küm tashi nung crore 3000-4000 shi liasü aser tanübo crore 14,000 kümogo," ta pai ashi.

Minister-i ashiba agi, Modi sorkar kübok lenmang, apu aser tanga arrtsü nung infrastructure tem anasü asemsü agi timba kümogo.

China-i India litsü atsünga aruba dak sendakba nung Centre-i jenjang tapet magir ta shia Congress aser talisa Rahul Gandhi-i sorkar aija aruba mapang ka nung Jaishankar-i iba telangzüba agütsüogo.

Rahul-i, sorkari China nem telangzüba tesashi agütsütsü aser parnok India litsü nung amenokba magizüktsü ta jangja jangja metetdaksütsü nungdaker, ta ashi.

Congress lenir-isa, China raratsü atema renemdar ta shia iba amokmeren sentoka toktsütsü merangba atema Centre aija liasü.

MULUNGNEN O



Lt. I. Tamsü Longchar Rtd. Director, Sericulture, PgD (Seri) 09.04.1939 - 11.02.2023

Ozü temeim kinungbo aser tsürabur mapang talangka temang manemi alidang aser pa Kibuba kidangi meyipa aoba anogo aser mapang nung shirnokisa onok dang kanga meima yariogo, nenok ajak den onoki tebang agi meshitetba tepela lemsateper. Nenok temeim aser teyaritap ajanga onok mangyim jashi mapang agi kanga junga litetba nisung taküm ka asoshi pelatepba mapang tajungang ka küma mungogo.

- Onoki item dang ya kanga pelaba shisemer :
1. Kohima Ao Baptist Arogo
2. City Church, Kohima
3. Mewibogei Fellowship & Mewibogei Youth
4. Forest Colony Union
5. Akhoya Senso Telongjem, Kohima
6. Longchar Kidong Telongjem, Kohima
7. Waromung Senso Telongjem, Kohima
8. Kohima Waromung Longchartsür Telongjem
9. Managing Board, teachers and staff of Chandmari Hr. Sec. School, Kohima
10. Director, Officers and Staff of Sericulture Department
11. ANPSA & ANPSA-Kohima Unit
12. Officers and staff of NSMDC Ltd., Kohima
13. Officers and staffs of Nagaland Legislative Assembly Secretariat
14. Officers and staff of Office of the PCCF
15. Doctors, Nurses and Caregivers
16. Kidang - kiyonger, tembar-medemer, kinunger-adianu aser temeimerterem. Nenok ajaki pa nem akhüm tetushi tulu agüja onok den yaritapba asoshi onoki maneni pelaba nenok den lemsateper. Tulusang Tsüngremi nenok ajak nem tatem makai Pa temeim aser temoatsü agüjang ta onoki sarasademstür.

- Temeim Kinungtsü, Chirur aser Kinungertem.

Bengal lemdangtsü atema tasa asaba ajak raksatsütsü: Mamata Banerjee

Siligury, Tsüklai/February 21 (Agencies): North Bengal nung BJP-i nüburtem lemdangtsütsü atema inyaksangshir ta shia Bengal, chief minister Mamata Banerjee-i Mongolbarnü ashiba agi, lai aniba sorkari state mesüngjemi kümdaktsütsü atema tasa asaba ajak raksatsütsü ta ashi.

Mamata-isa, lar sorkari Bengal ajunga nung terenlok bener arutsütsü atema inyaksangshidar aser state lemdangtsütsü atema tasa asaba ajunga tembangdaksütsü ta ashi.

"Bengal lemdangtsütsü atema tasa asaba ajak onoki raksatsütsü," ta lai ashi.

West Bengal assembly-i Hombarnü, state lemdangtsü atema merangba ajak nokdangtsü atema bangzüng ka yangluogo, koba BJP-i ashiba agi yimden yimsüsüba tsütsü jilushi ka lir.

Kurseong indang BJP MLA Bishnu Prasad Sharma-i, state kübok iba tesem nung aliba nüburtemi state den dener asü medenner aji jangjatsü atema referendum ka agitsü khanga liasü.

Gorkha Janamukti Morcha (GJM) aser Hamro Party-i iba bangzüng anema February 23 nü Darjeeling hills ghonda 12 mokdanga ayutsü ayongzükogo.

Darjeeling district nung sorkar sentong ka nung shilem agiba mapang Banerjee-i, lar sorkari longkak aiba tapu balala khenyongi magizüktsü mesüra class 10 state board tatidang agiba mapang longkak aiba sentong kecha ayongzüka magidaktsütsü, ta ashi. Class 10 tatidang ya February 23 nü tenzüktsü.

"Onoki longkak aitba politics aginogo. Tatidang agütsüba tesemi aoba mapang kaketshir kar danga minprongra onoki jenjang tapet agitsü," ta lai ashiba den iba mapang lokti senden kecha agitsü memelatsü ta ashi.

Banerjee-isa, lar sorkari mapa inyaksü atema maongka agütsütsü asoshi inyakba BJP puri raksatsütsü meranga recruitment drive tem anema okadak ken o benoker ta ashi.

State sorkar tenzükter shirnoki Centre den liromedema dearness allowance (DA) meshia longkak aitar, parnok ajangzükdaksütsü atema kanga tongtibangsüa lai inyaksü, ta Banerjee-i ashi.

State finance minister Chandrima Bhattacharya-i tawa sorkar tenzükertem DA shilem asem ajungkettsüba sangdongba sülen parnok kari ghonda 48 tashi longkak aiba sentong ka ayongzüka liasü.

Toda kin nungi nüburtem Ooty anasa Kandalmund tesem nung benjung ka amungba noksa nung angur.





TIR YIMYIM

YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 22, 2022

Oshi aika agi sayuba

Taküm 2023 küm alima tetsü oshi anogo Tsüklai (February) 21 anogomung omen " Oshi tapu aika-Shisaliok Tajungba Kümdaktsütsü Asoshi Tenüngdaksü," ta shimteta mungogo. Atangji, asen lima nungbo tesem aika nung iba anogomung ya memetetika dang kecha sentonga magii dang süidaktsür südi. Ajsüaka, ano talisa, Ao Baptist Arogo Mungdang (ABAM) den züngoka aliba lim arogo tem nungbo Tsüklai 21 nusa mesüaka jelia agiba osang angashir. Alima tetsü oshi anogomung amongtsüba ya tamasa 1952 küm tang Bangladesh ta ajaba lima ya East Pakistan asüba mapang, West aser East Pakistan nung Urdu oshi dang masü saka East Pakista nung alirtemi jembiba tetsü oshi Bangala oshi dena kin oshi akümtsü ta Dhaka nung lokti senden tulu ayongzüka longkak aitba mapang police-temi nisung pungo khasetba anogo aser pei tetsü oshi atema taküm bendanga agütsürtem nem akhüm tetushi agüja shimtetba anogomung ka lir. Atangji, iba sülenji dang, talisa, oshi meputepba tsütsü nungji 1971 küm Pakistan nungi pilar Bangladesh aküm. Iba jagi tanübo parnoki aginüba ama Bangladesh nung kin oshiji par oshi Bengali lir. Aji oda, alima nung oshi tapu meyirijang tenet dak tali jembibatem ya kata mesamadaktsüi jembitsü aser amshitsü nungdakba United Nations-ia angateta, 2000 küm nungi alima ajunga nung Tsüklai 21 nü ya Tetsü Oshi anogomung amungtsü ta United Nations Educational Scientific and Cultural Organisation (UNESCO)-i sangdong. Iba küm aser anogo nungi taküm küm agi Alima Tetsü Oshi anogomung 24 buba tashi mungogo. Aji oda, asenok Ao kin nem agütsüba tetsü oshi Jungli Mongsen na dang masü saka yimtsüng ka nung jembiba oshi aser osü dena mesamadaktsüi amshitsü aser renlokaktsütsü asoshi ABAM-ia Alima Tetsü Oshi Anogomung ya 2020 küm nungi arogo shia nung munga arur. Iba jagi, talisa, lim arogo tem nung tanurtem aika pei tetsü oshi sapua jembitsü angazüker aser taintemia pei tetsü oshi mesamadaktsüi jembitsü aser sayutsü ajungshitepa inyaker. Atangji, UN-i angatetba amaji tetsü oshi agi sayubasa temelaba, tajungba aser taretba bilema angazüker. Aji oda, asenok kinunger aser yimtsür yimertem rongnung dang masü saka Tsüngrem dena pei tetsü oshi agi jembibasa tedangshiba aser tangashiba amai bilemer. Taküm alima tetsü oshi anogomung omen nung ashiba ama, alima nung jembiba tetsü oshi ajak ya tongtibang, anungji akok tashi tanurtem dang parnok tila asüdangyongi kaketreju nung pei tetsü oshi agi sayu tenzüksüba kanga tongtibang akümer. Asen lima nung taoba küm aika asen tetsü oshi yabo mashimemetet kin aser nisungi jembiba oshi amato tanurtemi bilemtsüsa, parnok azüngdak kaketreju nung English oshi dak alaka kenyongi pei tetsü oshi mejembidaktsüi inetba rogo tem aika pei tetsü oshi dang masü saka pei tetsü aser tebua memeim kuma inetba angur. Aji oda, English-bo jembir saka peisasa pei bok sünga meliteter aser tsürabur temeima memetet ta kechi lima nung aliar meshitetka alirtem asen nisung aser kinungertem aika lir. Ibaji asenoki pei tetsü oshi mezüngmeshiba nungi tenzüka timtemtem lir. Aji oda, kidang jembiba oshi balaka aser kaketreju nung jembiba oshi balaka ta asüba tsüngda nung aienertem aika kata masü, kata masü ta zünger mapa manguba rogo tem rongnung adener. Atangji, tanübo alima ajunga agi yimtsüng ka ama kümer aliba putu asünungji, alima nung alir ajak den angatetepa jembitettsüsa tangar bendanger tongtibang oshia ka anabosa shia alitsüla. Iba jagi dang alima nung tangar den liromedema nungdak mapatem inyaka otettsü. Ajsüaka, bendanger oshi ana asem junga jembitetyonga asen tetsü oshi mejembitetra, asenoki parnok oshi jembiba bendangertem tsüngdang asenok akhüm maket akümtsü. Asenoki English jembiba agi asenok English nung ama kuma ao saka asenoki asen tetsü oshi mejembiba ajanga asenok Aor masü kuma adok nungbo, asenoki Ao kin samadaktsür asütsü aser English nungertem asenok menütsütsü.

OLEMSABANG

Mokokchung 27 Kimung - 2

~Akok Walling, Kumlong Ward, Mokokchung.

Yihovai niang saklok
Yimsüsütsü par dak amsü kao
Kü süngküm telongi azü azüa ait.
Par kilem-atep semteta maliyong
Kü kimung nung tera yangtet den sako
Legislator Asemwati
Legislator Imtimeren
Legislator Chubatoshi
Legislator Nüngshizenba
Legislator Lipoktemsü
Legislator Metsübo
Par tamaren akhümji – kü meyonger;
Kü awaketa meyongnem ya – par temoatsü.
Par yavong MLA mendenibo mati
Par temang temaba menden nungang yangpong
Yongji tzütelang tashi chuba,
Takar sensaker mebendang ayimsünga pari prok;
Züngpong kü kimungsa temoatsüba!

Scholars, technocrats poktetdak mepuji
Kü kimung nung;
UPSC, NPSC, HOD's züindak mepuji
Kü kimung nung;
Yimsoshiba tamendakdak, Teachers Colony ta,
Yihova mulongnensa, Mission Compound ta
Tetemjen nungja walok mepuji
Kü kimung nung;
Yimsü-yimpong, yimten-yimli tasüngtet
Amalitep tesünep mepuji
Kü kimung nung;
Terenlok, azükaru nung ranglok
Tsüngsang mepong temang tizük mepuji
Kü kimung nung.
Kü Hon Jubilee joko kümsük ka tang
Kü tenung melenaka
Kü nela-senmang longma nung mentet

Ochiba nung songtet, ni metet ni kong noktdak –
Süngyanglu külemdak mali
Yihova külemdak züiner
Limapur, arasener shilem maka –
Laishir, Tsüngremlar temangi akhümbanga
Kü kimung sünep süngzük koda tulu!
Ni aser ozü Kimungbo Yihova asoshi.

Naga nung election yimsü, Kü tebilemba

~ B. Wati, Choumukedima

Tangar lima otsü mejembir. India nung Atal Behari Vajbhair tsüngro-songa jembiyim(oratory)agi India nung aika puadakja million aikati vote agüja PM mela-mela dang aküm. Pa Hindu nung surnung pa asüdang Muslim nung aikati jeba mang-ayim. Dr. Abdul Kalam Muslim nung surnung pa asüdang Hindu nung ajunga agi ama pa mang-yima ajeb. Narendra Modi-a iba kesa tashi amshiba agi Hindu nung ajungai ama pa nem vote agüja PM kümdaktsü. Nübor-lenir akümtsü temsü-metemsü telokti nung kechi-koma jembir kanga tongtipang lir. Kechiba? Lokti tentet balala nungi teshimtetpur rongnung parnok molungjang nung tsünga jembia par nübor atema inyaksüba lir.

Tia maka, Naga nung atemabo ya mim (social toxin) asütsü akok. Iba state nungbo yimküm mapang nungi amshiba tribal democratic yimsü nem-ang anishidaktsür. Ozü kin, par kin, par-kidong, ozü-kidong, par-tzükong, ozü tzükong... yamala. Iba yimsü agi adokdaksüba temenen aika alitsü akok.

Political party agenda-tem nunga tanga state-tem nungbo Central govt allocation dak alaka pei state rongsen jenjang (state economy) ama party leadertem nübor nem tenangzüka tasen agütsür. Asen lima yamaji masü, itasen-a mapang nung magütsütetba. Naga nung politiciantemi kechi tenangzükatemsa proker item ajakji New Delhi nungi aruba metsüjangtem lir.


Shitak dang surnung ola adoka koma-ang mejembiba ochi yimsü ka, Ao kin nungi CM ka adokra Ao-er govt, Angami kin nungi CM adokra Tenymia govt yamala (itia-apunikan govt ase helibina) ta jembir. Ni bilemer ya melenshütsüba kanga tasak südi.

Ao sensopur Mokokchung adener (outside of Mkg) alirtem, kecha kin nungia nübor lenir tangar tashi-temeteter rongnung adokba ama shinga melika, ano madoktsüang südi. Naga nung atemabo Tribal democratic tradition-ang tetemsü ama lir, Mokokchung district nungi pilar Ao-er candidate kwi lir parnok nem nü vote odang agüjang.

Tensa mapang kar mesüra kar nungbo kija poksüng agi menokdaktetsüba tensa-sa ajurur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung sayutsüngiba mapang Khristan lenir ka apu



Lutheran reverend Yousef Zamgila (abelen) ajanga August 19, 2019 kum par arogopur den Omdurman nung tenlaki ka nung jembidang tangokba noksa nung angur. Islam nung general Omar al-Bashir yimli kubok Sudan nung Khristanpur kum aika reshikangshia aru.

Juba, Tsüklai/February 21 (Agencies): Southeast Sudan nung arogo lenir kati Muslim nung dang sayutsüngiba mechi ketdangsürtemi Hokulbarnü apu, ta yangji aliba Khristanpur telok kati ashi.

Yousif Ayoub Hussein Ali ya Blue Nile state yimtiba, Ad-Damazin nung yimtung nung tekülem sentong ka agidang apu, ta yangji aliba General Union of Christian Youth ajanga sangdong ka nung ashi.

Ali yagi tamangba yimsü tsütsü tesempatep adokdaksü aser Muslim nung dang sayutsüngi asü ta aitsü, ajisüaka Sudan nung tamangba yimsü sangdongba anema ozüng kecha mali, ta ashir. Pai sayutsüngiba ajanga tanurtem temolung meyiptsü tsübor ta yangji aliba Muslim nungertemi ashir.

Pa apuba ya tamangba yimsü temedenba aser international treaties nung aibelen lir, kong Sudan ya züngsema lir, ta General Union of Christian Youth ajanga ashi.

"Iba ama tim masüba yimya onoki aitsür, koba international treaties den mapet," ta iba telok indang sangdong ajanga ashi.

Tang aliba transitional civilian-military sorkar ya kum 30 tashi Islamist dictator Omar al-Bashir-i yimsü süa aruba 2019 kum tembangba sülen tentet aser tamangba yimsü mashi dang temenen ta ajaba ozüng agi memela kumdaksü, anungji Islam yimsü yutsüba nem tasüba temerenshi agütsüba ozüng agien.

Sudan nung kum ana tashi tamangba yimsü nung temeden lia arur aser sharia (Islamic law) kar agien, saka October 25, 2021 nung mitkar temi tashiyim amshia sorkar atsüngdokba sülen sorkari yaria tamangertem reshikangshiba meyipa aruogo.

Ali apuba ya Sudan nung Khristanpur temeden anema tanen makai mapa tamajung inyakba ka lir, ta General Union of Christian Youth-i ashi aser tekeraba nung pa chioktsü akhanger.

2021 kum sorkar matsüngdokdang aser atsüngdokba sülen non-state actor temi Khristanpur reshikangshiba lir aser yamaji inyaker nem sorkari temerenshi agütsüba mali. Al Jazirah state kubok El Hasahisa jila nung November 21 nü arogo lenir kati sarasadem sentong ayongzükba atema arisen mapa inyak ta aija apu aser tepuokdaki yok.

Pastor Abdalla Haron Sulieman-i anir tetsü asoshi sarasadem sentong ka ayongzükba liasü, shiba tetsüng nung komo adoka mejajateti liasü, aser iba mapang ketdangsürtem Sudan Presbyterian Evangelical Church tesemi aita pa apu.

North Darfur state nung Khristan lenir kati Islam yutsüba mechi ita tetenzüklen par kinunger temi pa pua tepuokdak ayutsü asoshi Muslim extremists tem shimba sülen pa jenshia senzür.

Open Doors indang 2023 World Watch List nung Khristan ka asütsü asoshi tasaktiba linüktem rongnung Sudan ya jenjang 10 buba nung lir, koba taoba kum jenjang 13 nung liasü, kechiaser non-state actir temi lendong timtem agütsüba manener aser national level nung tamangba yimsü temeden nung temelenshi yanglubatem yimdak-yimtsüng nung mamshir.

2021 World Watch List nung Sudan jenjang 13 bubai aluba ya kum trok nung temaba jenjang ter nungi mezüngbuba alubaji alitsü. US State Department indang International Religious Freedom Report ajanga ashiba agi, Sudan nung tamangba yutsüba merenshia aliba ozüng agienba aser tekülem ki raksatsüba anen saka conservative Islam temi lokti amokbanger lir, Khristanpur bendanga amshir.

US State Department ajanga 2019 kum Sudan ya Countries of Particular Concern indang list nungi agiena watch list nung yok. State Department ajangasa Sudan ya December 2020 nung

Special Watch List nungi agiena liasü.

Taoba mapang Sudan ya Countries of Particular Concern nung 1999 nungi 2018 tashi liasü.

October 25, 2021 nung mitkar tashi amshia yimsüsüba menden atsüngdokba sülen Sudan nung Islamic ozüng tesashi tanaben benoktsü Khristanpuri tsüboa bilemer. September 2019 nungi tenzükba ato kilonser ama transitional government nung inyaka alisang Abdalla Hamdok ya kum ka jungnüa kidang pua ayu aser chiokba sülen November 2021 nung tashi lemsatepa yimsü asütsü züngzüktepba nung anioka liasü.

Sudan nung Khristan nütsüng ya million ana mesüra nütsüng yongsük million 43 dak tema aliba nung shilem 4.5 shi alitsü ta asadangteta lir.

ANOGO ABEN TSÜNGREM DEN

Sannüker Nungi Anisüngzük

"Au, ni tasü akhüm ayongküm ajanga jajaaka, ni kecha lendong metsübuttsü; kechiaser na kü den lir; ne mechi aser ajok agi ni sünepdaktsür."- T.Ken 23:4

Tsüngrem Chir ka ama na kodanga ne kija masü! Ne Sannüker ne den mapang ajak nung alir. Ne tia nung nai kodanga majatsü. Pa kong lir ta na kodanga süngmanga malitsü. Timtem mapang nung Pai na toktsütsü ta na kodanga tsübuua malitsü. Pa ne jakdang aor; Pa ne tsütsü jajar; Pa ne sülen anidaker. Pai na kumzükba tongdang. Pai alushijak shia metetta aliba ama, aser ne kolak nung ku ajak züngtetta ali ama, Pai na teti repranger (Lk.12:6-7). Nai Pa menguaka, Pai teti Pa tenük dak ayur. Tejashi mapang nung Pa tashi itta ne den aliba agi na süneptsür. Pai tasü akhüm lenden ajanga na anir. Pai nai aginüba ama lenden meketa manir. Na ammag lenden ajanga aotsüla ta ne Sannükeri meteta na ibaji ajanga anir. Aji saka na jajaba ajunga nung Pai na meimer aser ne den lir ta tejangja metetdaksür. Tamalen metetba dang nungi iba mapang Pai na meimba tarokba nung metettsü.

Nai tamajung tsübuttsü menüngdak. Tamajungbai na metetba dang nungi ne Sannükeri na tajungba metetta lir. Pai tamajung ajak ngua lir aser ajak madak Pai takok ngua lir. Tamajungbai Pa aoksa aputsü makok. Na kodang aser kong timtem ajurutsü ne Sannükeri teti metetta renema lir. Ne Sannükeri tajung dak bendanga amangang. Pai na tongdangtsü aser Tammangtiba lenden ajanga Pai na meimba sayutsü.

Mozambique nung missionary pilot nem bail magütsür



Ryan Koher den pa kinungtsü Annabel aser par tanurtem tangokba noksa nung angur.

Inhambane, Tsüklai/February 21 (Agencies): Telungpur mapa inyakyim yarir ta temolung meleme ita pezü tejakdang apuba US nung amenoka aliba Mission Aviation Fellowship ministry indang pilot Ryan Koher aser iba tentet nung South Africa nung volunteer ana nem Mozambique nung aliba court kati bail magütsü. Pilot ya Tsüngrem nungi tesunep ngua lir aser Pai molungba nung lir, ta ministry ajanga ashi.

Arishi kum 31 tain Koher aser South Africa nung nisung

ana - arishi kum 77 tain W.J. du Plessis aser arishi kum 69 tain Eric Dry - nung ya tzükum anasa aliba Inhambane yimti nung November 4 nü timtema aliba Cabo Delgado Province kubok Montepuez district nung arogoi lapokba orphanage tem atema teyari osettem tayimtsü ka nung inokba mapang apu. Parnok bail nung chioktsü mepishiba ita tetenzüklen magizüki liasü.

MAF ajanga Hokulbarnü sangdong ka nung ashiba agi, Koher kinungtsü Annabel-i la

kinungbo tenüng nung tanen makai sarasademtsüba aser lumiba asoshi pelar.

Koher ya temang nung timtem adoka lir anungji pa temang mesaka memejangteter saka pa tawa tajungba mejanger aser ibaji MAF staff aser alima nung aliba Khristanpuri tanen makai sarasadema lumiba ajanga lir, ta Annabel-i ashi.

Bodhbarnü alima tesem balala nungi nisung noklang aika adenshia MAF den külemi Koher asoshi sarasadema lumia liasü, ta ministry ajanga ashi.

MAF indang website nung video message ka inoka aliba nung Annabel-i Khristan tem dang ministry den külemi la kinungbo asoshi Bodhbar shia sarasademtsütsü ajungshia liasü.

MAF sangdong ka nung Annabel-i ashiba agi, bail magütsüba asoshi la kinungbo mezüngbo tezü atang saka Tsüngrem dak tesunep angu aser Pai molungba inyaktü temolungtetba nung lir.

(Maneni tapak 7 nung...)

AO OSHI ANGAZÜKDAK:
TANÜ ANGAZÜKTSÜBA OJANG



Ozümi

(n) tenem ozü teben (hornbill feather)

* Yartsüngsangertemi korang nung ozümi songer tsüngsanger.

Ozüng

(n) tazüokba ken o, inyaksü latettsüba (law)

* Ozüng kübok tashi angaa alirtemji senso tajung.

OLONG PAITEP # 6436

1		2		3		4		5
			6		7			
8								
					9			
		10						
11								12
				13			14	
15								
16							17	

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6435 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



ALOKBA SCIENCE CLASS NUNG ANÜNÜR :

Missla : Alokba, na yasüng memejang asü koda, yamai anünür na?

Alokba : Miss, ni ya anünür masü nai ashiba ama gravitational force agi atsür alurba dangako.

Missla : Oh Alokba!

~ Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Karbi Anglong nung Rs 25 crore alang heroin aika apu



Guwahati, February 21, 2023

(Agencies): Assam kübok Karbi Anglong district nung heroin seret 4 tema apu aser iba ya state nung drug teimtiba apuba rongnung ka lir. Iba dak sendakba nung nisung ana pua lir, ta Chief Minister Himanta Biswa Sarma-i ashi.

Tang apuba heroin indang jenjangji international market

nung Rs 25 crore tema asütsü, ta police ketdangsür kati ashi.

"Karbi Anglong police-i Khatkhati nung Nagaland nungi aruba truck gari ka mita repringdang heroin seret 4.109 apu. Assam Police Dog Squad aser C-20 CRPF teyari agia iba mapau ya inyak aser iba atema Assam police nem tenüngsang agütsür" ta Assam CM-i

metetdaksü.

Osang tejangja ka angazükba sülen Deobar aonung gariji mita repring ta Karbi Anglong police-i ashi.

Onoki truck gari ka anendaksü aser idangji Assam Police Dog Squad nungi sniffer warrior "Danny" ajanga heroin seret 4.109 menemteta apu, ta Karbi Anglong police-isa ashi.

Manipur nung ex-minister jabaso tepsetba atema NSCN (IM) tanishir ka apu

Imphal, February 21, 2023

(Agencies): Manipur nung taoba mapang minister ka jabaso tepsetba atema NSCN (IM) tanishir ana puogo ta Manipur chief minister N Biren Singh-i Mongulbarnü metetdaksü.

Tena rongnung kabo NSCN (IM) kilonser (senior minister) lir. Ano iba ken o dak sendakba nung NSCN (IM) züngsem ka jenshir, ta pai ashi.

Iba ken o ya Manipur state forces-i mekoktetra NIA mesüra CBI ama national enforcement agencies ket nung agütsütsü, ta Biren Singh-isa ashi.

Manipur Legislative assembly session indang mezüng anogo nung opposition Congress party MLA K Ranjit Singh-i asüngdangba ka langzüdang CM Biren-i iba osang lemsatep.

Police-i tesem balala nung NSCN (IM) nung Deputy Kilonser (Minister) Moses Gonmei (41) aser Thokchom Sonia (40) ta ser tetsür ka apu, saka Stephen ta ser NSCN (IM) Kilonser ka jenshir.

Akoijam Nonganba (Aging) tepsetba nung shilem agiba kulitem ngutetba agi tena tepuokdak yua lir, ta CM Biren-

i metetdaksü.

Iba mapa ya NSCN (IM)-i telok tenüng nung asü mesüra kijai inyak ta asüngdangdang "tang tashi nungbo iba kuliji mengutet kechiyong bushisüngdang ano metembang lir" ta paisa langzü.

Taoba Manipur minister Ak Laingam'er jabaso Ak Nonganba ya February 12 nü Changoubung nung sür lia angu.

February 11 nü pai pa tetong Thokchom Sonia den külemi Swift gari temerem ka nung mener apusoa liasü. Iba sülen Nonganba kidangi meyipa maru saka Sonia bo aru.



Agartala nung Bangladesh Assistant High Commission-i "Mahan Saheed Diwas" (Great Martyrs' Day) aser "Antarjatik Matribhasha Diwas" (International Mother Language Day) 2023 amongdang agiba noksa angur. Iba sentong nung Bangladesh linük wako tom tashi atsüzük aser Bangabandhu aser oshi balala atema taküm bendanga agütsür ajak nem tetushi agütsü. Maneni, Bangladesh President, Prime Minister, Foreign Minister aser Minister of State for Foreign Affairs ajanga züluba onüktem zünga metetdaksü aser Great Martyr's Day o International Mother Language Day indang documentary kar sayu. (Agartala, February 21)

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

Case No.: OA/331/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 2898

CANARA BANK
VS
KITOKALI YEPTHOMI



To,
(1) KITOKALI YEPTHOMI
D/W/S/O- KHEKIHO YEPTHOMI
WIFE OF SHRI KHEKIHO YEPTHOMI TOSHIBO VILLAGE, NUILAND SUB DIVISION DIST DIMAPUR
797112 NAGALAND
Dimapur, NAGALAND

(2) MR KHEKIHO YEPTHOMI
SON OF HENKHO YEPTHOMI TOSHIHO VILLAGE NIULAND SUB DIVISION DIST DIMAPUR 797112
NAGALAND

DIMAPUR, NAGALAND -797112

SUMMONS

WHEREAS, OA/331/2022 was listed before Hon'ble Presiding Officer/Registrar on **14/02/2023**.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. **3038020.88/-** (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

- to show cause within thirty days of the service of summons as to why relief prayed for should not be granted;
- to disclose particulars of properties or assets other than properties and assets specified by the applicant under serial number 3A of the original application;
- you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
- you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;
- you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on **24/03/2023** at 10:30A.M. failing which the application shall be heard and decided in your absence.

Given under my hand and the seal of this Tribunal on this date: **15/02/2023**.

Signature of the Officer Authorised to issue summons.

Assistant Registrar
Debt Recovery Tribunal
Guwahati

Note :Strike out whichever is not applicable.

Mozambique nung missionary... (Tapak 5 nungi...)

MAF ajanga ashiba agi, US Embassy nungi ketdangsür kati hopta tetenzüklen Koher semdang aser tapentsü sü aser danga osettem agütsü aser Koher ya anogoshi ghonda ka tema nung mapang indoker ta ashi. Parnoki Koher atema shiti tem agütsü, koba tepuokdak ketdangsür temi asadanga sülen pa nem agütsütsü.

Koher tensa asadangtsü atema MAF indang country director-i US Ambassador Vrooman den ajurutepa liasü.

Ita asem jungnüa nung Annabel aser tena jabaso Elias aser Hezekiah nungeri Koher den phone ajanga January 24 nü jembiteta liasü.

Koher-i US Embassy ajanga MAF US dangi shiti zülua arur.

"Ni junga lir aser temang anema lir. Christmas atema tepuokdak chiyongtsü balaka agütsü. Parnoki teti ama azüngken aser an tetsüng melena nashi shi aser Coke Zero agütsü," ta pai shiti ka nung zülua liasü.

"Ni anogoshi exercise agütsü meranger. Mapang timba Laishiba azüngba nung indoker. Yangi alir kati kü indang English Laishiba den melentepa

Portuguese Laishiba agütsü - ni Portuguese oshi tajungba akumtsü atema ibaji amshir."

"Tsüngremi komala lenmang nung ni anidir, ni inyaksü mapa ka lir aser timtem nung ni tsüboa malitsü, kechiaser ni Yisu den lungjema lir. Item yagi ni temolung anisüngzüker, kechiaser pa kü den alitsü ta ni meteta lir aser item ajak nung nükjidong ka-ka lir. Osangtajung mapa inyakra nung Pai ni yaritsü asoshi imlibilema sarasademjang," ta pai zülü.

Koher dang asüngdangyaba mesüra temang shi nung tim masüba mapa inyakra mali, ta MAF ajanga ashir.

Taoba mapang MAF ajanga sangdong ka nung par asem yagi telungpur telok kata meyarir, kechiaser parnok telok yagi mapang talangka nungi telungpur temi timtem agütsürtem anepalua arur, ta ashi.

Tzücum anasa aliba Cabo Delgado province nung Islamic extremists temi timtem agütsü arur. Yangi gas, rubies, graphite, hon aser danga ali rongsen peria aliba mechi 2017 kum civil war ka tenzük. Item rongsen nungi tajangzük anguba ya yimsü tesüdak Frelimo Party

nung tanishirtem dangi aor aser yangji alir nem mapa ajema agütsür, ta longkak aiter temi ashir.

Mozambique ya Khristanpur timba aliba linük ka lir, saka Cabo Delgado nungya Muslim nunger timba lir, kong Islamic extremists temi tashiyim amshia tetsürtem pua bener aor, teburtem child soldiers kumdaktsür, ta The Washington Post ajanga taoba October ita sangdonga liasü.

US nung amenoka aliba International Christian Concern ajanga ashiba agi, Cabo-Delgado province nung tenzükba jihadist telungpur temi 2017 kum sorkar nungi anguba rongsen kar yimdaklir nem agütsü parnok molung nung kongshi aser nisung kata metepset. Ajisüaka mapang talangka melie IS temi Khristanpuri mesemtetba yimsüngtem nung mi senloktsü tenzük aser yangji alirtem tepset.

Ryan chioka kidangi meyipa shilangtsü ya teinyaktsü mapatem rongnung tongtipangtiba lir aser pa asoshi ajaki maneni sarasademtsü ayongzüker, ta MAF ajanga ashi.

EU-i Myanmar nem tenokdangba tasen agütsüogo

Strasbourg, Tsüklai/February 21 (Agencies):

European Union-i Myanmar nung er entities 16 indang kiojen/rongsen tamshi majung kümdaktsüba den parnok senzüsenpongtsü atema tenokdangba agütsüogo. Tenokdangba agütsürtem rongnung energy minister, shishilemar tongtipangtem aser tongti ketdangsürtem densema lir. Myanmar nung meimchir temeden anema inyaksangshiba atema iba jenjang agiogo.

Maneni tenokdangba agütsürtem rongnung Myanmar nung yimti tulutiba Yangon nungi yimden yimsüsürtem aser administrator tem densema lir. Osang ajanga ashiba agi item nisungtem ya 2022 kum July ita pro-democracy activists pezü tepsetba, nisung meyirejang aika aika tepsetba achaayangba, tayimtsü amshia tesem balala amakba aser linük kübok Kachin state nung military operation mapang civilian tem jong ama amshiba nung densema liasü.

"Coup nung shilem agirtem aser azütokshi lendong adokdatsütsü asoshi rongmesoba aser meimchir temden anema inyaksangshiba atema aitsütsüla," ta EU-i Hombarnü sangdong ka ajanga metetdaksü.

EU-i nuburtem temeden anema inyaksangshiba aitsüogo, kong sexual violence, civil society balala nung inyakerem, osangbenertem aser nuburtem reshikangshiba densema lir. Kulitem rongnung parnoki school aser mozüki balala tayimtsü amshia amakba densema lir.

EU-i tenokdangba agütsürtem rongnung Myanmar indang energy minister Myo Myint Oo, armed forces chief-of-staff General Maung Maung Aye, navy chief Admiral Moe Aung aser military nem hadir balala agütsüba firm asem indang tenokal densema lir.

Kachin state nung regional military commander Major General Ko Ko Maung ya EU-i, taimtsü amshia tesem balala amakba, nuburtem tepsetba

Kachin nung nuburtem jong ama amshiba atema aitsüogo.

Yangon nung Lieutenant Colonel Myo Myint, shiba taoba mapang military obendanger liasü, pa 2022 kum July ita democracy activist tem tasüba agi merenshitsü atema obendang agütsüba aser parnok tepsetba nung densema aliba atema aitsüogo.

"Military obendager ama pa tenure mapang opposition nungi züngsemtem aika tasüba agi merenshitsü aser tepuokdak mapang talangka ayutsü atema obendang agütsüba liasü. Anungji 2021 kum coup sülen meimchi temeden anema inyakra nung pa densema lir," ta EU-i ashi.

"EU-i maneni arms embargo ka densema tenokdangba balala agütsütsü ayonger, ajita asünungdang prangbong hadir balala ayokba aser belenshiba nokdangtetsü, kechiyong item yagi tashiyim amshia inyaksangshitsü atema military nem tali tashi agütsür," ta kasa sangdong ajanga metetdaksü.

EU-i iba jenjang agiba ya Myanmar shadow National Unity Government aser Burma Campaign UK-i pelashishia agizükogo. Iba telok yagi linük nung tatalokbatem kanga kümdanga meita atar.

Kanga junga asadanger tenokdangba agütsüogo ta shia Burma Campaign-i, EU-i aviation fuel, arms brokers, military procurement entities densema military den shishilemar aser ketdangsür tejen aser parnok den sendaktepa aliba lokti tentettem dak rangloker jenjang agiogo, ta ashi.

EU-i taoba mapanga nisung 93 aser entities 18 nem tenokdangba agütsür lir aser tang item nisungtem aser entities tem nem tenokdangba agütsüogo. Tenokdangba agütsür alirtem indang kiojen/rongsen ajak tamshi majung kümdaktsüogo, parnok EU linüktem nung senzüsenpong mesütetsü aser EU sensotem shinga parnok den inyaksangshi mesütetsü.

Military-i 2021 kum Aung San Suu Kyi-i aniba sorkar atsüngba sülen EU-i tang agi trokbenbuba tenokdangba agütsüogo.



Brazil nung tzünglu kanga sashia aruba ajanga tzükum anasa aliba Sao Sebastiao yimti nung Juquehy beach anasa anentsüh tesashi alua ki ka aser gari ka anebanga aliba noksa nung angur.

BFI-i foreign coach asütsü Dmitry Dmitruk shimogo



Tsüklai/February 21, 2023 (Agencies):

Boxing Federation of India (BFI)-i, nungtugu veteran coach Dmitry Dmitruk, India team indang foreign coach asütsü shimogo aser pa lenisüba nung India nung boxing asayar tajungtiba tem küm ana tashi asayatsü.

Dmitruk, shiba Irish Athletic Boxing Association (IABA) indang high-performance coach aser Irish National Junior aser Youth Team coach liasü, pa lenisüba nung taruba asayamung tongtibangtem nung India tetsür aser tebur team asayatsü.

Dmitruk shimba indang jembiba mapang Boxing Federation of India tir Ajay Singh-i, "Indian boxing team foreign coach ama Dmitry Dmitruk shimba pelashishia sangdonger. Irish Athletic Boxing Association den inyakba mapang Dmitruk-i pa coach

tajung ka ta kuli agütsüogo. Linük nung sempet tajung aketba boxer tem anitetsü atema pa sempet dak onoki tamang akar. Pa shimba ajanga Paris Olympics 2024 nung India team-i medal atimba angutsü atema nukjidong aliba tali tajungba kümdaktsütsü. Dmitruk tajangshiba aser sempet ajanga tetsür aser tebur team asayaba yimya tajungba akümtsü. Pa ajanga youth aser junior boxer tema ajangzüktsü imlar," ta ashi.

Arishi küm 47 tain coach yagi Ireland boxing team tem ajungketba nung tongtibang shilem agiogo. Pa tawabangba kübok Joe Ward-i World Championships nung 2015 aser 2017 küm silver medal nguogo aser Grainne Walsh-ia 2019 European Games nung bronze medal nguogo. Irish boxing team coaching staff nung shilem ka

ama pai 2016 Rio Olympics atema par linük nungi boxer tem qualify asüba nung tongtibang shilem agia liasü.

Kasa mapang nung Boxing Federation of India's Secretary General Hemanta Kumar Kalita-i, "foreign coach ama Dmitruk shimba ajanga linük boxing team nem teyari tulu agütsütsü. Arishi küm tatakzük balala nung boxer tem achaayangba aser takokertem aniteta experience ajanga pai teyari agütsütsü ta federation-i temulung lema bilemer.

IBA ranking nung India top 3 nung lir aser tang Dmitruk coaching team nung densemba ajanga alima nung asayamung tulutem nung takok tajungba angutsü atema taruba jenjang agitetsü ta temulung lema bilemer," ta ashi.

Pai tetsür aser tebur team naprongla achaayangtsü. India-i tawa World Championships, Commonwealth Games aser Asian Games nung medal aika nguogo aser alima nung team tajungtem rongnung ka kümogo.

"India tawa boxing powerhouse ka kümdar aser sempet tajung aketba asayartem den inyaksü atema maangka anguba asoshi kanga pelar. Kü career tepeyong tajangshibatam amshia asayamung tongtibangtem nung maneni takok tajung angutsü ta temulung lema bilemer," ta Dmitruk-i ashi.

Odisha FC captain Carlos Delgado-i tenangzüktepba yanglushi

Tsüklai/February 21, 2023 (Agencies): Spain nung defender Carlos Delgado-i Indian Super League (ISL) club Odisha FC nungi 2024 küm tashi asayatsü atema tenangzüktepba tasen ka yanglushiogo.

"Don Carlos maotsü," ta Odisha FC-i Delgado adokba video ka lemsatepba mapang zülüja liasü.

Delgado ya centre-back nung asayar aser 2019-2020 season nung Odisha FC nung aru adenba sülen par team atema asayar tongtibang ka lir. Pai asaya kanga junga asadangtetba aser anüing nung ball kanga junga asayatetba ajanga pa club atema kanga tongtibang asayar ka kümogo. Ibayongji club-i pa den tenangzüktepba tasen yanglunüa liasü.

Pai Odisha FC atema kanga tongtibang shilem agia arudar. Pa arua adenba sülen team defence tajungba kümogo aser pa ya ground telung aser tema nung lenir ka lir. Pa tashi aser

asayaba yimya ajungba ajanga tongtiba ball tem tackle asüba aser tekolak agi ball atonga nung teyari tulu agütsür aser pai kanga süngjema asayatetba ajanga team ajungmesor.

Tarutsü atema team ka yanglutsü asoshi club merangba mapang asayar tongtibangtem mechioki ayutsü kanga tongtibang. Iba dak sendakba nung Carlos ya kanga tongtibang lir. Pa tajangshiba aser lenisüba ya team asoshi kanga senti asütsü aser talisa taruba season nung team asayaba yimya tajungba küma asayatsü asoshi rangloker inyakba mapang iba ya kanga senti asütsü.

Arishi küm 34 tain asaya ya India nung football asaya nung tongtibang asayar ka kümogo aser league nung pa asayaba ajanga lanur asayartem aika ajungmesor. Pa den tenangzüktepba yanglushiba ajanga Odisha FC dang masü saka India nung football asaya kanga ajangzüktsü.

Taoba Real Madrid asayar Amancio Amaro süogo



Tsüklai/February 21, 2023 (Agencies): Taoba Real Madrid asayar aser honorary tir Amancio Amaro arishi küm 83buba nung Mongolbarnü süogo.

Amaro, shiba 1962 nungi 1976 tashi Real Madrid nungi asaya liasü pa asaya 471 nung asaya aser iba mapang goal 155 idakja liasü. Pa dang El Brujo (The Magician) ta ja liasü.

Real Madrid-i pa asüba osang club website ajanga sangdonga liasü. "Amancio Amaro arishi küm 83buba nung süogo. Pa Madridistas aser football fan tem ajaki iba asaya legend ka ama teti menungra bilemtetsü. Real Madrid-i Real Madrid fans ajak den asükhu lemsateper," ta club sangdong ka ajanga metetdaksü.

Amaro ya La Coruna nung 1939 küm October 16 nü aso. Pa Deportivo nungi Real

Madrid nung arua aden. Deportivo nungi asayaba mapang pa Second Division nung goal timtiba idaktsüba asayar liasü.

1962 nungi 1976 tashi Madrid nungi asayaba mapang Amaro-i, league title teku, Spanish Cup asem aser European Cup ka kokogo. 1966 küm Brussels nung Cup final asayaba mapang Amaro-i Madrid atema equaliser idakja parnoki asaya akokba nung teyari agüja liasü.

Asaya nungi anenba sülen Amaro, Bernabeu nung youth team coach mapa inyak aser pa lenisüba nung Real Madrid Castilla-i 1984 Segunda title bena liasü.

Iba sülen pa Real Madrid nung consultant aser board züingsem ama inyakogo aser taoba küm honorary tir asütsü shima liasü.

Women's T20 batter rankings: Richa Ghosh top-20-i iogo

Tsüklai/February 21, 2023 (Agencies): Mongolbarnü sayaba ICC Women's T20I rankings nung India wicketkeeper-batter Richa Ghosh jenjang 16 tejakdangi tua top 20-i iogo.

Taoba hopta Women's T20 World Cup nung West Indies den asayaba mapang out mesüi run 41 aser England den asayaba mapang run 47 yangluba sülen la tang mezüngbuba jenjang 20buba nung lir. Smriti Mandhana (third), Shafali Verma (10th), Jemimah Rodrigues (12th) aser Harmanpreet Kaur (13th) nung sülen la top 20 atongba India tsürtem rongnungi pongubula kümogo.

New Zealand all-rounder Amelia Kerr aser Pakistan tsür Muneeba Ali nata tena indang career nung jenjang tajungtiba ajangzüktepba.

Paarl nung Sri Lanka den asayaba mapang Kerr-i run 66 yangluba sülen la tang 16buba nung lir aser Muneeba-a jenjang 10 tejakdangi tua tang 64buba tongtetogo. La ya Pakistan tsürtem rongnung T20I nung century yangluba mezüngbuba asayar lir.



Kasa mapang nung Kerr bowler tem rongnung jenjang 13buba nung lir.

Australia captain Meg Lanning, shiba Bangladesh den asayaba mapang out mesüi run 48 yanglu la jenjang ka tejakdangi tua pezübuba aser New Zealand captain Suzie Bates-a jenjang ana tejakdangi tu tang trokbuba nung lir. Lai Bangladesh den asayaba mapang out mesüi run 81 aser Sri Lanka den asayaba mapang run 56 yanglua liasü.

South Africa tsür Tazmin Brits (up six places to 21st), England tsür Amy Jones (up two places to 26th), Ireland tsür Orla Prendergast (up eight places to 38th) aser Sri Lanka tsür Harshitha

Samarawickrama (up four places to 39th) nung ajak tejakdangi tuogo.

Pakistan all-rounder Nida Dar-a jenjang ana tejakdangi tua tang 37buba nung lir aser bowler tem rongnunga 16buba nung lir.

Bowler tem rongnung India tsür Renuka Thakur-i England den sayaba mapang run 15 agütsür wicket pongu agiba sülen la jenjang tenet tejakdangi tua tang pongububa tongtetogo.

New Zealand fast bowler Lea Tuhuhu, 10buba nung aliba 7bubai tuogo, lai tang mezüngbuba rating points 700 jungogo. Asaya pezü nung lai wicket ti agiba sülen iba jenjang ajangzüktepba.

Australia tsür arishi küm 19 tain Darcie Brown tang mezüngbuba top 10-i iogo, aser West Indies captain Hayley Matthews-a top 10-i iogo.

Tanga bowler tem rongnung Pakistan tsür spinners Sadia Iqbal (up 13 places to 20th), West Indies Karishma tsür Ramharack (up 44 places to 28th) aser New Zealand tsür Eden Carson (up 14 places to 37th) nung ajak tejakdangi tuogo.

BILEMDANGANG

"Shirangeri inyaktetsü mapa kecha mali."